

N° 2023/O1/036

Question orale déposée par Marie-Claude BRANCA
Au nom du groupe « Core in Fronte »

OBJET : Chì suluzioni pà u pasturismu pà a Corsica di dumani ?

Sgiò presidenti,

Una sissantina d'anni fà hè natu in Corsica un zittiddu chì da tandu hè crisciutu be è meddu. U cuniscimu tutti, si chjama turismu è hè in piena forma incù u so amicu l'amori di u soldu faciuli.

Disgraziatamenti à tempu à a so nascita hà cuminciatu à morasini a noscia sucità agropasturali.

A situazioni di l'agricultura è più particularmenti di u pasturismu chì sarà u sughjettu di a noscia dumanda d'oghji impighjurisci. Rigularmenti tutti i gruppi, quì, mosciani a so primura fendu dumandi annant'à l'aiuti d'urgenza.

Ma incù u cambiamentu climaticu, l'impurtazioni di u latti o di a carri d'altrò, a sparizioni di i tarri agriculi à u prufittu di i custruzioni, l'invasioni di u turismu in i loca innanzi risirvati à i pastori è tanti altri prublemi, l'urgenza duventa a regula pà i pastori. Òn li pudemu lacà spariscia, iddi chi da l'alba à l'abbrucatu, da un capu d'annu à l'altru sudani è soffrini pà fà campà i so animali è i so famiddi è pruducia pà a Corsica

Sgiò presidenti di l'ODARC di sittembri rispundindu à una di i nosci dumandi ci aveti parlatu di l'aiuti privisti è di suluzioni à long'andà chì sariani pussibili pà middurà a situazioni in u vosciu duminiu di cumpitenzi è sapemu chì ghjust'à puntu in 'ssa sessione hè privistu u studiu di un rapportu annant'à i ricirchi scientifici pà middurà par esempiu a produzioni di l'alimentazioni è di l'animali.

Sapemu chì altri sirvizi è urganisimi travaddani pà truvà suluzioni. Ma ci pari urgenti e più efficaci di metta in sinergia tutti l'uffizi, urganisimi è sirvizi di a noscia cullittività cumpitenti in stu duminiu pà travaddà à fà rinviscia viramenti sta filiera.

Ch'iddi sighini i sirvizi di a furmazioni, l'AUE, l'uffizi di u fundariu, di l'ambienti è di a biodiversità, l'Uffiziu Udaulicu, a SAFER, u cumitatu di a muntagna corsa, l'urganisimi scientifici è ben intesa l'ODARC.

È di sicura òn si pò metta in opara un travaddu tamantu senza a partecipazioni attiva di i pastori chì cunoscini i loca, u funziunamentu di l'animali è di a natura e chi so l'eredi di un sapè fà chi veni da i nosci anziani.

Sgiò presidenti, quandu ci mittimu tutti insembru à u travaddu pà cambià u mudellu di sucità attuali è rimetta à u centru di a sucità u pasturismu è l'agricultura chì ci parmittariani à pocu à pocu di ritruvà l'autunomia alimentari chì assistia innanzi è di metta un pocu da cantu stu turismu invasivu chi s'allarga sempri di più ?

Vi ringraziu.